

ԱՐԱՐ ՀԻՆԳԵՐՈՐԴ

ՔԱՋ ՆԱՉԱՐԻ ՎԵՐՁԸ

Նոյն պալատական սրահը

ՆԱՉԱՐ.– (Բազմած է թախտին. Սաքո՝ նրա հետերը բռնել է դրոշակը: Նազիր—վեզիր, զօրավարներ, պալատականներ, տերտեր, թամադա, Ղոռոբբուղա եւ միւս հսկաները կանգնած են Նազարի դիմացը եւ երկիւղած՝ սպասում են նրա խօսելուն: Լռութիւն: Սպասաւորները՝ Սենեկապետի առաջնորդութեամբ, խնկամանները, ձեռներին մտնելով ներս, զանազան ձեւերով խնկարկում են Նազարին եւ ապա Սենեկապետի հետ զգոյշ, ակնածութեամբ դուրս են ելնում: Նազարը մտախոհ՝ համրիչ է գցում եւ իր մէջ բաներ է ապրում: Շատ լուրջ եւ կարեւոր վճիռների առջեւ է, ձեւերն արտասովոր են, հագում է եւ սկսում:) Ի՛նձ նայէք, գեաղէ՛ք: Ձեզ հրաման պիտի տամ ու թագաւորական խօսքս պիտի ասեմ: Շատ կռիւների մէջ եղա, շատ կռուեցի ու շատ յաղթեցի: Ես վերջին մեծ կռուից էլ, փառք աստծու, տեսաք, որ էլի յաղթող դուրս եկանք: Գեաղա, ես ի՛նչ բաներ եմ, գեաղա՞, ես ինչ նշանակ է, ես ի՛նչ տուրք է, գեաղա՞: Ես էն տուրքն է, գեաղա՛, ես էն օրէնքն է գեաղա՛, ես տեսնում եմ, գեաղա, որ աստծու մատը խառն է եւ ամենի մէջ: Ու աստծու օրէնքի մէջ եղպես էլ յատուկ ինձ համար գրած է, որ ամեն անգամ ես պիտի յաղթեմ:

ՏԵՐՏԵՐ.– Վկա է աստուած կենդանի:

ԲՈԼՈՐԸ.– (Խոնարհուում են ի նշան խորին երկիւղածութեան:)

ՆԱՉԱՐ.– Ու հիմի, գեաղէք, ահա ես իմ բերնով հրամանք եմ անում ձեզ, որ իմ ցեղս սուրբ է, իմացիր, գեաղա, որ ժողովուրդը ինձ համար է ծնւում, ինձ համար ապրում, ինձ համար մեռնում: Ժողովուրդը պիտի աշխատի, ես ուտեմ: Դրա համար էլ ուզում եմ, որ սրբերի դասը դասուեմ:

ՏԵՐՏԵՐ.– Եղիցի՛, եղիցի՛ եւ եղիցի՛:

ԲՈԼՈՐԸ.– (Երկիւղածութեամբ խոնարհուում են:)

ՆԱՉԱՐ.– Հիմի ինձ նայէք, գեաղէք: Մինչեւ հիմի աստուած էր օգնում ինձ, հիմի իմ գործը ես իմ ձեռքով պիտի տեսնեմ: Հիմի ես ամենքին կյաղթեմ: Իրա համար էլ, գեաղէք, հիմի ես ուզում եմ, որ ողջ աշխարհը զգեմ ոտիս տակ: Ինչացո՞ւ է էսքան տերութիւնն ու թագաւորը: Ես հերիք եմ: